

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Uzvišeni Allah, vjernike je počastio time što je poslao Muhammeda, s.a.v.s., jer On, u 164. ajetu sure Ali Imran, kaže:

Allah je vjernike Milošću Svojom obasuo kada im je jednog između njih kao Poslanika poslao, da im riječi Njegove kazuje, da ih očisti i da ih Knjizi i mudrosti nauči, jer su prije bili u očitoj zabludi.

Velika je blagodat, za sve nas, braćo i sestre, što smo pripadnici Ummeta Poslanika, s.a.v.s., i što idemo jasnim putem islama koji nam je on pokazao i što će se on, zauzimati za nas na Sudnjem danu. Zbog toga nam je Poslanik, s.a.v.s., preči i od nas samih.

Ljubav prema Muhammedu, s.a.v.s., braćo i

sestre, proizilazi iz ljubavi prema Allahu, dž.š.. Ta ljubav je naša obaveza, jer je Poslanik, s.a.v.s., Njegov miljenik i dostavljač Kur'ana, koji je uputa cijelom čovječanstvu.

Prema tome, tko voli Allaha, dž.š., on voli i Poslanika, s.a.v.s., i slijedi njegov sunnet.

Muhammed, s.a.v.s., je najbolji, najpobožniji, najskrušeniji, najbogobojazniji, najkompletniji i najodabraniji čovjek i Poslanik.

Ljubav prema Poslaniku, s.a.v.s., se ogleda u slijeđenju njegova sunneta, a zlatna generacija ashaba nije postavljala pitanja i potpitanja na ono što je Muhammed, s.a.v.s., tražio od njih ili što im je zabranjivao, jer su bili uvjereni da „**on ne govori iz svoga hira**“ (En-Nedžm, 3) i sve što je govorio on je na najljepši način primjenjivao u svome svakodnevnom životu. Poslanik, s.a.v.s., ih je upozorio da je postavljanje mnogobrojnih pitanja od naroda kojima su prije njega dolazili poslanici bilo uzrokom njihovog zastranjivanja.

Ljubav prema Muhammedu, s.a.v.s., mora da bude veća i od ljubavi prema sebi, kao što

stoji u predaji koju bilježi imam Buharija a prenosi Abdullah ibn Hišam, r.a., koji kaže: „*Bili smo kod Poslanika, s.a.v.s., kada je uzeo za ruku Omera ibn El-Hattaba, pa mu Omer reče: „Allahov Poslaniče, draži si mi od svega, osim od sebe!*“ Pa je Poslanik, s.a.v.s., rekao: „*Ne, tako mi*

Onoga u Čijoj je Ruci moj život, sve dok ti ne e budem draži od samoga sebe!“ Pa mu je Omer rekao: „*Sada si mi tako mi Allaha draži od samoga sebe!*“ Poslanik, s.a.v.s., reče: „*Sada, Omere!*“ (Buharija)

Čvrstina i iskrenost imana su uslovljeni ljubavlju prema Poslaniku, s.a.v.s., kao što stoji u hadisu koji bilježi imam Buharija a prenosi Enes ibn Malik, r.a., koji kaže da je Poslanik, s.a.v.s., rekao: „*Niko od vas neće biti pravi mu'min - vjernik, dok mu ne budem draži od djece, roditelja i svih ljudi!*“ (Buharija)

Slast imana neće osjetiti oni koji ne budu posjedovali troje, o čemu govori hadis koji bilježi imam Buharija a prenosi Enes ibn Malik, r.a., da je Poslanik, s.a.v.s., rekao:

“Kod koga budu tri svojstva, osjetit će slast imana: Da mu Allah i Njegov Poslanik (s.a.v.s.), budu draži od svega, da voli nekoga samo u Allahovo ime i da mrzi povratak u nevjerstvo, kao što mu je odvratno da bude bačen u vatru!” (Buharija)

Zapitajmo se, braćo i sestre da li posjedujemo ova tri svojstva, te da li u nama ima slasti imana ili islam doživljavamo kao dio naše tradicije i običaja!?

Poslanik, s.a.v.s., je Allahov, dž.š., Miljenik, onaj koji poziva Allahu, naša veza na putu prema Stvoritelju, opominjač, donosilac radosnih vijesti, onaj koji ljudima ukazuje na spas, tumač Kur'ana, onaj koji uspostavlja Allahov, dž.š., Zakon, predvodnik poslanika, naš zagovarač, poslanik čovječanstvu, spas i mir.

Njemu je Allah, dž.š., mimo drugih ljudi dao pravo šefa'ata (zauzimanja), dao mu je Kevser (Izvor u Džennetu) i na njega donose salavat Allah, dž.š., i melec.

Ljubav prema Poslaniku, s.a.v.s., se iskazuje sa njegovim uvažavanjem, donošenjem salavata, slijedenjem njegova sunneta i pomaganjem islama.

Jednom riječju da ga volimo i slijedimo, kao što su ga voljeli i slijedili njegovi plemeniti ashabi i dobre generacije muslimana poslije njih.

Braćo i sestre, slijedimo sunnet našeg Poslanika, s.a.v.s., i volimo ga istinskom ljubavlju!

Uzvišeni Allahu, molimo Te, učvrsti nas na putu islama! Učini nas od onih koji iskreno vole Poslanika, s.a.v.s., i slijede njegov sunnet!

Amin!

Prethodne hutbe potražite na: www.medzlis-split.org

Pripremio: Vahid ef. Hadžić

Split, 9.11.2018.

